

Do žingsnė Tāvės linkou

ROGPJŪTĖ ŽINGSNIS

Ne rodou dā... šešoulė — kārtas met,
Sogolė suodna galė luoš ėš čiesa
Katrou lasiuojau — Tavėi vielek vėsa
Jau nu bėrželė... Atmėni? Kumet
Po lėtaras kroupelė... nesogėls,
Atkondės vakars žaruos kėrtė
Pavuožuojau, metilės — kartės.
Ė kas, ka tuolėms Tāvės linkou kėls...
Ė lītaus viesie — nepakajaus smuoks...
Apėjės kerpiem dongaus žvilgė, ruoduos,
Gėloms — nemačīs rūtėi skūpas ruodas
Kuol Tāva pieduom slėnkstis nesonuoks.
Uknuolis asluo padkavas ėiškuos.
Neradės — smūtnā želiuos dolkiū pėrštos,
Katrėi vėrp čeravuoti dūmās tērštās
Nu mūrė — atdūsės, be pabonguos
Lėtanėjės ėš abruozda lig sau,
Ligo ne sau (pritūravuo Aguotā)
Kėimālė lėipa — jopa nusmagiuota
Saulėlės skūpās spindolės — lasiau

Ė anus, ne vėin žingsnius — Tau
Rogpjūtė brīdė kuol ejau, ejau..

SPALĖ ŽINGSNIS

Kumet žalvarė vārpa atuodūsė
Parkėrps dongu ė gerviū baltoma,
A ni znuoka nebus — Tau paruodīsio
Piedū rodėnėis nuogni skalsoma...
Kor šermokšnis kraujou da nu vakar.
Be pakajaus, vies debesi karpa.
Vėinišītė tən vuortinklis pakar,
Tarp sekundiu — mėnkiausė nie tarpa.
Ka negimto ėšTavuoję varda,
Žvilgė — būvis vėrpous, be vėitas...
Spalė ruoduom — kousnis apkarta
Dounas plotuos, spūtkelie kėituos.
Ėto, ėto... Ė nabie gala
Tāvės linkou. Nuors — priš pat soma,
Suopė skreitė ražėinu bala,
Nu šermokšnė vuotiū skaudoma

Ėto, ėto... Žingsnė tik do.
Tuokėi ėlgė... Ož anū — To.